

Zeitschrift: Schwyzerlüt : Zyttschrift für üsi schwyzerische Mundarte
Band: 3 (1940-1941)
Heft: 10-12

Artikel: Bundesfyr
Autor: Haller, Paul
DOI: <https://doi.org/10.5169/seals-178356>

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

Download PDF: 13.03.2025

ETH-Bibliothek Zürich, E-Periodica, <https://www.e-periodica.ch>

Sächsehalb Jahrhundert . . .

Sächsehalb Jahrhundert Eidgenosse :
Sächsehalb Jahrhundert zsäme glitte,
Gschaftt und au sich gfreut und zäch entschlosse
— Wän's hät müese sy — au zsäme gstritte.

Sächsehalb Jahrhundert strubi Zyte
Händ is starch gmacht. Fürigs Bluet isch gflosse,
Rot isch 's Banner, Bluet tuet zsäme kitte :
Sächsehalb Jahrhundert Eidgenosse.

Strubi, doch au gueti Zyte, Fride
Hämer gha. Die händ is glehrt, daß wäme
Ei s ist, sich vertrait und sich cha lyde
Wyt chunt. Eidgenosse ! Hebed zsäme !

Rot isch 's Banner, 's Chrüz isch wyß, da lyt's :
Bund us Bluet — de Fride wyst is 's Chrüz.

* * *

Einig sy und frei, das händ si gschwore
Uf dr Rütliwise. Nöd vergäbe
Händ die Alte Guet und Bluet verlore :
Ohni d' Freiheit, wettisch wyter läbe ?

Ohni d' Freiheit hett's kä Sinn meh z'läbe
Für en Schwyzer. Frei isch er gebore,
Frei au wott 'r sterbe. Eusers Sträbe :
Freiheit ! Dir mit Seel und Lyb verschwore !

„Oeppis Tapfers tüend, um Gottes Wille“,
Hät en Große, euse Zwingli gsait.
Treu und eifach gläbt händs und sich stille
Geschickt is Schwer und 's dure kämpft und trait.

Sächsehalb Jahrhundert Schwyzerchrüz :
Rot und wyß, dur Bluet zum Fride — Schwyz !

Emmy Rogivue-Waser (Ms. 1941).

Bundesfyr.

Sächshundert Johr sind drüber gloffe gsi.
As d'Äiggenossen i de höchste Bärge
Am grünenste See uf hertem Schwyzerbode
Für Rächt und Freihäit zämegstande sind.
Das sind no Manne gsi mit March im Rugge,
Mit Bluet im Härz und Munichraft im Lyb,

Mit Liebi gäge Chind und Wyb,
 Mit Haß und Rach am Find, a sine Tier und Lüte.
 Im Herrgott händ si sini äigne Waffe
 I Bärg und Wald vertlehnt. 'S het gchätzeret,
 Wi wen de Roßbärg iez scho abe chem,
 Und Roß und Harnisch sind im See versunke.
 Die Junge händ no was der Ätti glaubt,
 Und niemer het uf d'Syte dörfe stoh,
 Wenn disi bättet händ. Im ganze Land
 Händ alli Freud gha oder alli briegget,
 Und käine het sis Gras uf äigne Matte
 Und Alpe gmäiht, de Bärg het allne ghört.
 Wi d'Chlätte sind si aneander ghanget,
 Wi d'Distle händ si gstoche gägem Find,
 Wi d'Rose blüejht und obem Blüehje gchratzet.
 Vo frönde Here händ si Laste trät,
 Bis gnue gsi ist; do händ si d'Chöpf ufgrüehrt:
 Jez träged sälber, wen si trät müend sy!
 Es tapfers Wort isch nie vergäbe gsi
 Im alte Schwyzerland, s het zündt und brönnt,
 Und wen en Ma gsi wer, wo mit sim Gält,
 Mit Zeis und schlechtem Loh de Nochber druckt
 Und d'Armet gschunde hätt, das tapfer Wort
 Hätt tapfere Tate grüeft und Rächt wer worde.
 Stolz sind si gsi, voll Laster und voll Tuget,
 Voll Fläcken und so hell wie Gletscherys.
 Im Schwyzerwage händ si d'Achse gschmiert
 Mit Bluet und Schwäis; drum lauft er no wi ame;
 Drum händ au i dr schönste Summernacht
 Vo allne Höchene di rote Für
 Is Tal und gäg de bläiche Sterne zündt.
 Vom Räinerbärg und ab der Lägere,
 Vo Gisli-, Wasserfluh, vom Wyßestäi,
 Im Bärnischen und über Neuburg,
 Durs Wattland y bis gägem Gämferегge
 Händ d'Jurabärge gflammt, en Fackelzug
 Dr Schwyzergränze noh, und übers Land
 Vom ewige Schnee, vom wyße Gletscherrugge,
 Vo tusig Alpespitz hets widerglüchtet,
 E wunderbari großi Bundesfyr.
 Us schwarzem Talgrund singe d'Obeglogge
 En Schwyzerpsalm; katholisch, refermiert,
 s het alles zäme glüetet, alles gstimmt. —

Us: Paul Haller „s Juramareili“.

Verlag H.R. Sauerländer & Co., Aarau.